

PAAVORO ITIONCAJIAQUENERI

PIRIPOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncajianquenerigueti tsaromentajiacarica Jesoshi choocajianquitsica guinteninintsiqui pajitatsica Piripo. Iriraqea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarensi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncotaqueri ichooaquegueti Paavoro Piripoqui paperiqui Yantajiguica 16.11-40; 20.1-6. Itioncacaantaquero Paavoro ocatica paperi isantanatacotacagueti. Chooqa quenquejajianquitsica itioncacaantaquero ajagantsiniqui 55 isantanatacotacagueti Epesoqui. Itsipajia iquenquejajiaque itioncacaantaquero irooca ajagantsiniqui 60, irooca otsipa ajagantsini arejevaetacaro ajagantsini 63, isantanatacotacagueti Iromaqui. Irootaquequea iquenquejantajitacaca, tequeratagueti intioncacaanteroji ocatica, itioncacaantaguequero paperipae itigarancajianquenerica Tesaronicaquitica, aisa mavite paperi itioncacaantajiaquenerica Corintoquitica, aisa paperi itigarancajianquenerica Garashiaquitica. Chooqa itsipajia quenquejajianquitsica itioncacaantajiaqueneri Iromaquitica, Epesoquitica, Corosaquitica, jeri aisa Piremoni tequeratagueti intioncacaantajigueneri Piripoquitica.

Ocaniqui paperiqui Paavoro iquenquejacaajajiri tsaromentajiatatsica Piripoquitica icavintsajiaquerigueti itigarancajianqueneri imentaquitsitepae iramitacojiaqueriniji itsavetacotantaquerigueti Quirishito (2.25; 4.14-19). Isantanatacojivetacarigueti Paavoro, ogantaga ishinemajataca (1.12-26; 2.17-18; 3.20–4.1; 4.10-13). Itioncacaantajiaquenerigueti itsatacaajiaqueri iroo ininqueca Aapani Irioshi ogantaga irishinejiaquempa quemisantajiaquerica, irooca onchooquegueti cameetsaguetsatsica, irooca aisa managuetanquitsica ichooajiaquegueti acaniqui quepatsiqui, ari iquejetaca iriatimpa Jesoquirishito (2.5-11). Itioncotaqueri Timoteo (2.19-23), aisa Epaperorito (2.25-30), aisa itsavetacotaca yantaguetaqueca iriatimpa (1.3-8, 12-26; 3.4b-14), aisa icamantajiaqueri quero incojiaquempani inchoocajianquenerijite cameetsa quemisantajiatatsica (1.9-11, 27–2.4; 2.12-16; 3.1-4a; 4.2-9).

1 ¹Naroguenti Paavoro, notsipatacari Timoteo, naroguentijia inintacajaia-queca Jesoquirishito nantajiaqueneri. Imaica nontioncaciaquempiqueate maasano aviatimpajia choocajiatsica Piripoqui yashintajiacaca Aapani Irioshi, pitsarotentajiacaritarite Quirishito Jesoshi. Notioncaciaquempi maasano, aviatimpajia aisa quempoguijajiguirica quemisantajiaatsica jerijia aisa amitacoji-queca. ²Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshotentajigaro taaca opajitapae.

Paavoro yamanacoventajiaqueriqueate quemisantajiaatsica

³Nocoguitaniqueate noquenquejajia-quempigueti nocantaqueri Aapani Irioshi noshinevaeca. ⁴Namanacoventajiaquempigueti noshinevaetacaqueate ⁵namaquequea aquejetavacaajiaa antajiaqueneri Amajirote cameetsanijite intsavetantimentajiqueronijite Quenquetsatsarensi Oganejencatatsica, piparianacaroquea iroaqueragueti piquemisantajiaquegueti arejevaecaquea imaica. ⁶Notsamajaquequeate incoguitempani incavintsajajiaquempi Aapani Irioshi iragavejacaajiaquempi, incoguitempaniqueate incavintsajajiaquempi inquejeta-caajiaquempi iroaqueragueti piquemisantajianaque arejevaetapojempa aapojajempagueti incoraqetantapojajempaca Jesoquirishito. ⁷Noshinetimentajianaquempiquea. Cameetsatarite nonquejetaquempagueti imaica, nopintsamajajiaquempitarite, namena-quempiquea yagavejacaajiaquempiqueate Aapani Irioshi patsipeventajiacaroquea Iguenquetsatsare, piquejejaque-naqueate naatimpa nantaquenerigueti Amajirote. Coramaniquea tequerata-

gueti irisantanatacojitenaji choocana-queate notsavetantaqueroquea Quenquetsatsarensi Oganejencatatsica tsavetantaquerica Jesoquirishito, nocantajiaqueriqueate maasano iroguentiquea iroomajaca. Aviatimpajia-queate picavintsajajiaquenaqueate pamtacojiaquenaquea. Ariqueate oquejetacaqueate imaica yoguijaajita-queagueti santanaqui picoguitani-queate picavintsajajiaquenaqueate. ⁸Itsamajaqueroquea Aapani Irioshi nopintsamajajiaquempiquea noquenque-jajiaquempiquea, iriguentitarite quenquejacaamajataquenaqueate Jesoquirishito. ⁹Irootaquequea namana-coventantamajajiaquempica arimpaniji pimpintsatavacaamajajianaquempa-queate, pinquenquejamajajianaquero-queate oganejencamajatatsicaquea, aisa pintsamajajianaqueroqueate maasano iniqueca Aapani Irioshi. ¹⁰Namanaco-ventajiaquempiqueate pintsamajajiaque-ronijite querocaca cameetsaguetatsica, pincomajamajajiaquempinijite, aatonijite ochoocati querocaca incanto-majimentajiaquempica Quirishito savincaguiteriqui incoraqetantapojajempaca. ¹¹Yagavejacaajiaquempitarite Jesoquirishito pincomajamajajiana-quempaqueate onquejetanaquemparo pimpitsaraquijacomajajianaquempa, irooquea irishineventantamajajitana-queparica Aapani Irioshi, incantajite-quea caavijiquea yoganejencamajata Aapani Irioshi.

**Isshinevaecaquea Paavoro
itsavetantajiquerigueti Jesoquirishito**

¹²Napitsarotentarijiate, noninquequea pintsajiaquequeate isantanatacojiveque-naqueate, cotanquitsiquea arimpaquea itsavetantamajajitanaqueroqueate Quenquetsatsarensi Oganejencatatsica tsatacaajiacajica quero icota Jesoquiri-

shito imeshiantigueti. ¹³Maasanotarite coareta quemoguijajiguinirica itsoviro-naquite majirontatsica jerijiaquea maasano quemacotaquenaca isantanata-cojitaquenagueti itsajiaquequeate iroguentiquea isantanatacotimentajique-naqueate nococanitari notsavetanqueri Quirishito. ¹⁴Chooaquea oshequi apitsariventarijiate tsaromentajigarica Quirishito yamenajiaquenagueticquea yoguijaajitaquenagueti santanaqui teequeate intsaroojianaquequeate iriatimpajia, icocaniquea itsavetantajia-queroquea Iguenquetsatsare Aapani Irioshi.

¹⁵Cotanquitsiqueate ichoocagarantajia-quequea itsipa manaqueate icatsimati-mentajiaquenaroqueate intati yamenajia-queenagueti icaramirincatimentajiana-queaquea ontaniqui caquinte, irootaquequeate itsavetacotantavecariqueate, inintajiavetacatarite iranaajia-queename intati. Cotanquitsiqueate ichoocagarantajiaqueate itsipa manaquea itsavetacovintsamajajiaqueri Quirishito, ishineventamajajiacarotarite Iguenquetsatsare Aapani Irioshi.

¹⁶Iriatimpajiaquea ipintsamajajiaquea-quea yamenajiaquenagueti iriguentiquea nintacaquena Aapani Irioshi nontsavetantajiaqueriquea Quirishito nontsatacajiaqueriquea maasano quero icota imeshiantigueti. ¹⁷Cotanquitsiquea irirajiaquea nintajiavetanquitsica iranaajiguena teequea irantamajaten-riji Quirishito, manaquea itsavetantave-tacariquea intati ijiqueji ari noshimam-pojancanaquempa, yamenajiaquenata-rite isantanatacojitaquena. ¹⁸Noncama-ntajiaquempiqueate choocaqueate tsavetantamajajiaquerica Quirishito. Chooajiaqueate aisa itsipa tsavetantaji-guirica manaqueate inintajiaquequea intati irishimampojancacajiaquena, cotanquitsiqueate naatimpa teequea

noshimampojancuempaji, manaqueate noshinevaetanacaquea namenaqueri-gueti iriguentiquea itsavetantaquequea Quirishito.

Imaicaquea arimpa noamajatanaque noshinemajatanaquempaquea, ¹⁹notsa-quetari pamanacoventajiaquenagueti aisa yamitacotaquenagueti Ishire Jesoquirishito, irooquea irantajitavaje-naca. ²⁰Teequea noninteji nantaque taaca opajita guipashivenquenanea, manaquea noninque nonquemisantama-jatanakeriquea Quirishito, aatoquea notsaroguitsi. Arigueti osamanigueti-quea nonchoocaque, aricampa irimeto-jajiquenaquea, noninquequeate noncoguitempaniquea nonquejeta-quempa imaica intsarovementamaja-jiquemparinijite Quirishito. ²¹Imaica-queate imaica choocatirajanagueti iroguentiquea noninque nonchoocaven-taqueroqueate nantaqueneriqueate Quirishito. Cotanquitsiquea caavijiquea anaquero nometojaquegueti, noninque-queate manaquea noanaque iriatim-paqui noncoguitempaniquea nonconoa-pojempariquea. ²²¿Querocacaquea caavijica anaantamajatanquitsica? Jmm, teequea nontsateji. Iroguentiqueate notsaquequea choocatirajanagueti acaniqui quepatsiqui noncoguitempani nontsavetanqueriqueate Quirishito intsarovementajiaquemparinijite itsipa caquinte. ²³¿Querocaquea noncoquempani? Omanamajatacaquea, mavitetarite noninquequea. Nonintave-caqueate nometojaque imaica noanaquequea nonconoapojajempari-quea Quirishito noshinevaetapojajempa-quea. ²⁴Cotanquitsiqueate ariquea nonintavajiqueate aatotaquea nometoji, namenaquetarite caaviji ocameetsa-taque nonchoocataquequea namitaco-majajiaquempinijite. ²⁵Irootaquequeate nontsatantacaca aatotaquea nometojitsi,

iroguentiquea nonchoocatashitaque nontampishitacajiaquempiquea pishinevaejiaquempanijite pintsaroven-tamajajianaquemparigueti Jesoquirishito. ²⁶Oraquea irovashiantajitajenagueti ariquea noncoraquetajatequea namenajijatempi pintsatimentajiaqueniijite manaqueate icavintsajamajataque-naqueate Quirishito Jesoshi, ariquea pishineventamajajianaquempari.

²⁷Jeroquea aparo pinquempejiana-quempa: pincomajamajapinijiaquempa-quea pinquejetananaquemparoca ocanquea Quenquetsatsarensi Oganejen-catsatsica tsavetanirica Quirishito. Pinquejejaquempagueti, aricagueti noashijianaquempiquea iroguenticaquea nonchoocavetaquempaquea osamani, nonquemacojiaquempiquea picancani pitsarovenamajajianacari Quirishito teequeate povashiantajigueteriji, aisa piconoavacajaianaquea patsipeventajia-caroquea Quenquetsatsarensi Oganejen-catsica pitsatacajiaqueriquea maasano quero ocanti. ²⁸Aatoquea pitsaroacagaritsi catsimajiaquempineca, ariqueate iramena-jiaquempigueti teequea pintsaroacaaji-guempariji ariquea intsamajiaquequea iriatimpajia arimajaquea incatsimamajajia-queriquea Aapani Irioshi oncoramanitapo-jajegueti, cotanquitsiquea aviatimpajia manaquea iraaajivajempiquea.

²⁹⁻³⁰Teequeate apaniroquea irintintacaaji-guempiji Aapani Irioshi pintsaroven-tamajiaquempariquea Quirishito. Inintacajia-quempiqueate aisa pantsipeventajiaquem-pariqueate pinquejejaquenaquea naatimpa natsipeventarigueti Quirishito, aisa imaica piquemacojiaquenaquea atsipetanatsinaqueate.

Pinquejejaquempariqueate Quirishito

2 ¹Imaica itampishitacajiaquempiquea Quirishito, aisa ipintsamajajia-quempi irootaquequea pishinevaetanta-

jiacaca. Aisa ichoocashirentajiaquempiquea Ishire Aapani Irioshi aisa picavint-sajavacaajiaquea pipintsatavacaajia-caquea. ²Irootaquequea nocantantajia-quempica pinintajiaquegueti pishineta-caajiaquenaquea, pincomajajiaquempa-queate aatoquea picatsimatavacaajiga, pimpintsatavacaamajajiguempaqueate, pinquemavacaamajajiguempaquea aisa pintsipatavacaamajajiguempaquea pantajiaquenerigueti Amajirote. ³Aatoquea pinintajiguetsi panaimanajigueteri papitsarovenarite. Aatoquea piquenquejajiguetsi pantajiaque paventacojiaquempaca. Majereni pincanquempa, pimpintsamajaquempariquea maasano pinquejetacaguempari pipintsamajatacarigueti anaamajaquempica. ⁴Aatoquea apaniro piquenquejatsi aviatimpa, pinquenquejacojiaqueriqueate aisa itsipapae.

⁵Pincoguitempaniquea pinquejeja-quempariquea Quirishito Jesoshi, pinquenquejajigue quejetaca iquenque-jaqueca. ⁶Arimpate iriatimpa iriguenti-vetacaqueate Irioshimajaca, cotanquitsiquea teequeate iranaanteji. Irootaque-queate icanquerigueteri Iriri incoraque-queate acaniqui quepatsiqui irivoaque inquejejiacajiquea aatimpajia, teequea incantanaquequea: "Aatoquea noguitsi, naroguentitari Irioshi."

⁷⁻⁸Manaquea yovashiantaguetanaquero-queate maasano yashintaguevetaca icoraquequitiquea acaniqui quepatsiqui, ivoaquitiquea icaquintemajatanaque-quea, teequea irimajirontajempaji, manaquea iquejetanacariquea yomperaitaca. Yatsipetacaqueate iquemisan-tacocaquea intati. Icoquitaniquea iquemisantamajataqueri Iriri, jeroquea inchiqiojita ipanacaroquea imetojanta-caca imetojantajiacajiqueate coroshiqui. ⁹Irootaquequeate icajeman-tanacarica Aapani Irioshi irimajironta-

majatapojempanijite, yanaacaavaeta-jiri irootaquequea ivajiro anaavaetantacaroca ivajiroepae maasano. ¹⁰Iquejetantacaricaqueate imaica irogueroventajiaquemparinijite Jesoshi maasanojia choocaguetatsica jenoqui inquitequi, acaniqui quepatsiqui, aisa isavipatsaqui. ¹¹Maasanoquea incantajiaquequea: “Jesoquirishito iriguentiquea Majirontamajatatsica”, ariquea intsarotentajitaquempariquea Aapani Irioshi.

**Ironigaacaantajiaquempa arimajaca
itsarotentamajatacaro Jesoquirishito**

¹²Nopintsamajajiacaca, coramaniquea nochoocavecagueti aviatimpajiaqui piquemisantamajajiaquenaqueate pinetsanamajajiaqueroquea maasano nocantajiaquemfica. Cotanquitsiquea imaica nochoocaquegueti osamani noninquequea arimpaquea pinquemi-santamajajianaquenaqueate. Imeshiajiaquempitarite Aapani Irioshi nocantantajiaquemficaquea pimpincatsamajajiaquerequeate pinetsanamajajiaqueroqueate maasano inintaqueca. ¹³Iriguentitarite quenquetsashirentacaajiaquem-piqueate Aapani Irioshi pinintimentajia-quenijite pantajiaquequea maasano ininqueca iriatimpa, aisa iriguentiquea tampishitacaajiaquempineca pagavejantajiaquemfaca pantantajiaquemparoca.

¹⁴Maasanoquea pantaguequeca ariguete asereaquempi aatoquea picantanaque pitse pitse, manaquea pishinevaetanaquempaquea intati, aisa aatoquea pipigatsatavacaanaca, ¹⁵aatonijiochoocatitsi querocaca incantomajimentajitaquemfica. Aisa netsana poguero piguenquejane, aatoquea piconoaguishtiroquea covaeguisherentsi pinquejemajatimentajiaquemparinijite Aapani Irioshi, aviguentijiatarite irijanijiate. Ariquea irirajiaquea antaguishejiaque-roca covaeguisherentsi iramenajiaquem-

piqueate quejevaejiaquempi impoqui-ropae iquitamiriaquitgueti opitsecaquegueti, teetari pinquejejiguemparijiri iriatimpajia, manaquea picomajamajatanaquea intati, ¹⁶aisa pitsatacaantamajajiaqueroquea Quenquetsatsarentsimajaca Anijacaantantatsica. Ariqueate incoraqueatajategueti Quirishito noshinevaequempaqueate, iramenaquenatarite teequea nantsipeventashitempariquea intati, manaquea noquemisantacaamajajiaquemfica. ¹⁷Noquejetacarocae imirajitaca ishaguitsijitantacarica viratsi itaajiqueneriguete Aapani Irioshi, aviguentijia quejejiaquemfica itaajiquenerica, patsipeventajiacaritari paventajiacaca pantajiaqueneriquea. Natsipevetacaquea, iro cotanquitsi noshinevaetaca namenajiaquempigueti aviatimpajia pishinevaejianaca. ¹⁸Imaicaquea ariquea pinquempajiaquempaqueate aviatimpajia aisa pishinejiaquempaquea pamenajiaquenguete nococaniquea noshinevaetanacaquea natsipeventacariguete.

Timoteo aisa Epaperito

¹⁹Irininqueguete Amajirote Jesoshi, iroaquerasanoquea nontigarancaqueriquea Timoteo iramenajiaquitempi. Irarejepojajempagueti incoraqueatajeguete noshinevaetanaquempaquea nonquemacojiajempiguete. ²⁰Tee anejirijiquea itsipa quejetaquemparineca iriatimpa, iquejetaquenaqueate naatimpa noquenquejamajia-juimpiguete. ²¹Itsipapaequea iriguentiquea quenquejacojiajatsi, teequea irioquea inquenquejamajajigue Quirishito Jesoshi. ²²Cotanquitsiquea aviatimpajia pitsamajajiguiritari Timoteo itsipamajatanaqueate yamiquenaquea notsavetantiroguete Quenquetsatsarentsi Oganejencatatsica quejevaeacaquea irio nirijanitemajaca. ²³Ariguete nontsaqueguetiquea quero

nontigarancaqueriquea iramenajiaqui-
tempi. ²⁴ Ariquea nonquejetaquempaquea
naatimpa, noquenquejaquetari inintaque
Amajirote iroguipaquiiajiajena taampina,
ariquea noncoraquetaquitequea namenaji-
ajatempi.

²⁵⁻²⁶ Coramani pitigarancajiaqueriquea
papitsaroveritarieni Epaperorito iramitaco-
quena. Irioquea nontsipatashitaca nontsavetan-
taquerigueti Quirishito. Imaicaquea namena-
quequea cameetsataque nontigarancajeri
iroanaje pinejajiaavajeriquea, ininquequeate
inchiquiojita iramenajiapojajempi, itsaqueta-
rite piquemacojiaqueri yashinoncajavaetaca.
²⁷ Arimajaquea yashinoncajamajatacaquea
pajinimequea irimetojeme, cotanquitsiquea
icavintsajaqueriquea Aapani Irioshi. Teequea
apaniroquea incavintsajeriji iriatimpa,
icavintsajaquenaqueate naatimpa aisa
aatoniji noshimampojancaamajata. ²⁸ Iroota-
quequea nonintantacaca nontigarancajeri
taampina iroanajequea aviatimpajiaqui
cameetsaniji pishinetimentajianajempañiji,
aatonijite noshimampojanquimentajiguim-
pitsi. ²⁹ Iriatimpa iriguentiqueate papitsaro-
ventarite pinconoajiajavajempariquea
pincavintsajajiaavajeriquea, ariquea pinqueje-
tacaajiaquempariquea maasano quejejiaca-
rica iriatimpa. ³⁰ Coramaniquea pajinimeta-
rite irimetojaventanaquerome yantaquene-
rica Quirishito. Iriguentiqueate coraquetan-
quitsica yamiquenaquea, teenicate pagaveja-
jigueji aviatimpajia pinchoocajiaque
naatimpaqui pamijiaquenaquea.

**Inchiquiojिताja piconoajigaritsijate
cantashitataroica
Quenquetsatsarentsimajaca**

3 ¹ Imaica, napitsaroveritarijiate,
pishineventamajaguempariqueate
Amajirote. Teequea nomperatemparo-

quea notioncajiajimpigueti aisa, napijiji-
ajimpiquea nocantajiaquempica
coramani pincomajatementajiaquempa-
nijite aatonijite querica amatavijaji-
guimpitsi. ² Pagamajiaquempari
irirajia amatavijantatsica quempeveta-
carica shiishi, pagamajiaquempari
irirajia peacagaroca covaeguisherentsi,
irirajia nintanquitsica intotashivijita-
caantempi intati pitsinoqui. ^a ³ Aroguen-
tijiatari totsaiquimashimajatanquitsica,
atsarovementamajiacaritarite Aapani
Irioshi yagavejacaajiaquigueti Ishire,
yashintajiacajiquea Quirishito Jesoshi
irooquea ashineventajia, teequea
aventajiguemparo amenavequempaca
atsinoqui. ⁴ Cotanquitsiqueate naatimpa
noninquemegueticquea naventaveta-
quemparo amenaqueca atsinoqui,
nagavejaquemequeate. Choocagueti
jivetatsica iragavejaque iraventemparo
amenaqueca itsinoqui cameetsaniji iro
irimeshiantajiaquemparica, caaviji
anaaque nashi naatimpa naventaveta-
quempameca. ⁵ Iroorijite novoaquegueti-
quea iroompaquea aapojacagueti 8
savincaguiteri itotsaiquijiqueroqueate
nochonquimashi, naroguentitarite
ishiraeri ichoviquini Vejamineni,
evereomajaca nonaque, noguenquetsa-
tsare iroguentiqueate evereotsa,
naroguentiquea pariseomajaca nontsipaji-
acariqueate nogonorroja pariseojia
nonetsanajiavetacaroquea itioncacota-
naqueca Moishishini. ⁶ Caavijiquea
nonintamajaveca nontsarovementamajata-
quemparime Aapani Irioshi, nocatsima-
tantajianacaricaquea tsaromentajiacarica
Quirishito, nojiqueji arijiquea icantashi-
tatiacarico nonetsanaguevecaca, namena-
vecatarite caavijiquea nocomajamajata-

a 3.2 nintanquitsica intotashivijitacaantempi intati pitsinoqui. Iriojia icantacotaque irirajia
cantajianquitsica intotsaiquimashitacaantempa maasano cameetsanijite irishineventavaquem-
pari Aapani Irioshi.

caquea. ⁷Cotanquitsiquea imaica teequeate nonquenquejacotajeroji maasano noshineventavetacaca coramani, teequea noshineventajempa-roquea iriguentinijite nonquenquejama-jaquequea Quirishito nontsamajatimen-querinijite. ⁸Caavijiquea anaaqueroquea oganejencamajataca nontsamajataqueri-queate Amajirote Quirishito Jesoshi, anaaguequeroqueate maasano noninta-guevetanica quejetanacaquea cajarashi-tequi nontsatimentamajataquerinijite iriatimpa, ⁹aisaquea nonconoimentama-jaquemparinijite. Teequea noncamee-tsatashitimpaji naatimpa. Nonetsana-guevecaroquea itioncanaqueca Moishishini, cotanquitsiquea tee onetsanatenaji. Manaquea naventacari-gueti Quirishito, irootaquequea inetsanatantaquenaca Aapani Irioshi. Ariquea inquejetacaguempariquea maasano aventajiaquemparineca irinetsanajiaqueriquea. ¹⁰Imaicaquea naatimpa manaquea nonintamajataque-quea nontsamajaqueji Quirishito. Noninquequea iragavejacaquenaquea naatimpa quejetacaquea yagavejaca-querigueti Aapani Irioshi yovochantaji-rigueti. Aisa noninquequea nantsipeven-quempari nonquejetaquempariquea iriatimpa yatsipeventajiacajigueti. Teequea noninteji nonquenquejajero-quea nonintaguevetacaca naatimpa, quejecaquea manaca notsipatacari Quirishito imetojaquegueti, ariquea nometajapitsatanaqueroquea maasano nonintaguevetacaca. ¹¹Noninquetarite nontancorejanaje oncoramanitapojaje-gueti nonchoocapojajequea iriatimpaqui.

Isavicaventamajatica Paavoro

¹²Teequea noncanteji netsanataca maasano nocantacoguequeca imaica,

aisa teequea noncanteji jac cameetsama-jatanajana. Manaquea panquenatanatsi-naquea nonetsanatimenqueroniji inintacaquenaca Quirishito Jesoshi iroorijite yashintajana. ¹³Napitsaroven-tarijiate, tequerataqueate nonetsanama-jaguetaquero maasano inintacaque-naca. Cotanquitsiquea jeroquea nosavicaventica imaica: teequea noninteji nonquenquejacotajero querocaca nantagueataquea coramani, manaquea arimpaquea noamajatanaquea nomoncaraqueroniji inintacaquenaca. ¹⁴Ariqueate noncotanaquempaniqueate imaica incavintsajimenquenanijite Aapani Irioshi iranaaquenaquea jenoqui inquitequi, irootaquetari icajemanti-mentajiacajica aventacarigueti Quirishito Jesoshi. ¹⁵Maasanoqueate tsariventamajajigarica Quirishito ariqueate inquejejaquempaquea imaica. Choocaguetequeate itsipaquea cantashi-tatiacaroca iquenquejajiaquegueti, inchiqiojitaquea ironigaajiaqueri-queate Aapani Irioshi. ¹⁶Cotanquitsi-quea aatimpajia iintsija anetsanajiaque-roquea maasano itsatacajaiacajica iriatimpa.

¹⁷Napitsaroven-tarijiate, pincomajaji-guempaqueate pinquempejaquena-queate naatimpa nocomajamajataca, nonigaajiaquempirotarite naatimpajia quero nocojigaquea noquemisantamaja-jiguirigueti Quirishito. Nocantantajia-quempicaquea anquejianaquempari-queate maasano quejejaquerooca imaica. ¹⁸Nocantajiavequempiqueate coramani, cotanquitsiqueate imaica noncantsijia-jempiqueate aisa, choocaqueate oshequini teeca irinintajigueroji Quenquetsatsarensi Oganejencatatsica tsavetantaquerica Quirishito imetoja-ventajiacajigueti coroshiqui imeshajia-cajiqueate. No

imaica, oparijaatananacaca nojaquija nocantajiaquempiqueti. ¹⁹Iriatimpajia iroaroaitanaquequea camorecariqui. Iroguentitarite ichoocaventajiaquequeate isheca, quejetaca iro irioshite. Teequea impashiventajiguempaji yantaguishejiaquerogueti covaequishe-rentsi, manaquea isemetacojiaquero-quea intati. Iroguentiqueate iquenquejiaquequea quepatsipaequitica. ²⁰Cotanquitsiquea aatimpajia atsajiaquequea manaquea oajianaquequeate jenoqui inquitequi ancoguitempaniqueate anchoocajiaque ontaniqui. Irootaque-queate imaica oguijantajiacaricaqueate incoraquetajeguetei Amajirote Jesoquirishito meshiajiacajica, iriguentitarite aajianajajineca. ²¹Oraquea incoraquepo-jajeguetei incantashititajiaipoajajiro-queate atsinojia teetarite onetsanamaja-tempaji, oganejencatanajempaqueea onquejevetanaquemparoniji irashi iriatimpa itsino oganejencataguetei. Iroguentiquea incantashitiantajiacajiro-quea iragavejane yagavejancaroca-queate maasano.

**Icantajiaqueriquea
irishinejiaquempaqueea**

4 ¹Imaica, napitsarorentarijiate, irootaquequea nocantantajiaquem-pica pincoguitempanija pintsaromenta-majajianaquemparija Amajirote. Naatimpa noquenquejajiajimpiquea noninquequea nonejajiaquitempi iroorijite nopintsajiaquempiquea. Aviatimpajiaquea pishinetacaajiaquena-quea, aviguentijiarite noshinetimenta-jiacaca.

²Oraqueate Evoria aisa Shintique noninquequea ovetsinantavacaajiajem-paqueate onconoavacaajiajempanijite, iroguentijiarite tsaromentajigarica Amajirote Jesoquirishito. ³Aviatimpa napitsarorentarite, notsipatashitacaca

antaqueneriguetei Amajirote, noninque-queate pintsatacaajiaqueroquea ovetsinantavacaajiajempaquate onetsantanajempanijite. Iroguentijiarite notsipatashijiacaca coramaniqui natsipeventajiacarogueti Quenquetsatsa-rentsi Oganejencatatsica notsavetantaji-aqueriguetei Jesoquirishito. Jeriqueate aisa notsipatashijiacaca Querimenten jerijia aisa itsipapae amitacojiaquena-ca, tioncacoguetacatari ontaniqui jenoqui inquitequi itioncacotantajiacarica Aapani Irioshi maasano choocajiaipojaja-tsineca ontaniqui jenoqui inquitequi aatonijite imetojajiajitsi.

⁴Pincoguitempanijate pishinetimentajia-quempariqueate Amajirote. Noncantsijia-jempiquea aisa pishinejiguempa.

⁵Pincavintsajantajiaquequeate, aatoquea pipigatsatantajiaatsi iramenimentajiaquem-pinijite maasano picomajamajajiaquea intati, irooshipojajitari incoraquetaje Amajirote. ⁶Aatoquea querocaca pishosho-ventajiajatsi, manaquea pincamantajiaque-riquea Aapani Irioshi pamanajiaqueri-queate taaca pinintajiaqueca. Pincoguitem-paniquea pishineventaquempariquea pincanqueriquea: "iAriotesaa!" ⁷Pinquejeji-aquempaguetiquea imaica iroguishineja-majajiaquempiquea. Pincoguitempaniquea pishinemajajiaquempaqueea pishirequi aatoniji pishoshoguitejajatsi, pitsaromenta-majajiacaritarite Quirishito Jesoshi. Cotanquitsiquea aatoquea oquejetarotsi oguishinejantajiguiguetei aatimpajia, caavijitarite anaqueroquea. Aatimpajia-quea teequeate agavejajigueji antsajia-quero quero icojiacajini Aapani Irioshi yoguishinejajiacajiguetei.

**Icantajiaqueriquea
inquenquejacojiaqueroquea
cameetsaguetatsica**

⁸Imaica, napitsarorentarijiate, apanivaniquea noncantajiaquempi

noninquequea pinquenquejacogueque-
roja maasano iroomajaguetatsica teeca
amatavijanteji, jeroquea aisa maasano
atsatocoguetica caavijica ocameetsama-
jati. Manaquea pinquenquejajigueja
pantajigue cameetsaguetatsica,
aatoquea piquenquejajigui pantajigue
covaeguisherentsi. Pinquenquejajigueja
quero pincojiaquempa pincomajamajaji-
aquempagueti, aisa pinquenquejamaja-
jigue quero pincojiaquerini pigonoropae
pinchoocatantajiaquempaca cameetsa.
Pinquenquejacojigueroja maasano
acantacojiaqueca oganejencavaeca.
Iroguentiqueate pinquenquejacojigue
maasano cameetsaguetatsica caavijica
ishineventacaca Aapani Irioshi.

⁹Coramani nochoocatimiojiaquitimpi-
gueti piquemisantajiaquenaqueate
notsatacajiaquempiguetei, aisa pamena-
jiaquena quero nocota. Imaicaquea
imaica noninquequea pinetsanamajajia-
queroqueate maasano notsatacajaia-
quempica, aisa pincomajamajajiaquem-
paqueate pinquejejaquenaquea
naatimpa nocomajamajataguetei. Pinque-
jejaquempaguetiqueate imaica
iriraquea Aapani Irioshi quisho
iroaquempi, inchoocatacaajiaquempi-
quea cameetsa aatoniji taaca opajita
pishoshoventajiajatsi.

**Iriraquea Piripoquitica
icavintsajajiaqueriquea Paavoro**

¹⁰Imaica noshinetacaquea noshineti-
mentanacariquea Amajirote namena-
queguetei piquenquejajianaquea
irootaquequea picavintsajantajiajanaca.
Cotanquitsiquea teequea noncanteji
pipeacojiavetajana coramani, notsaque-
tarite piquenquejajivetaquenaquea
cotanquitsiquea teequea pagavejajigueji
pincavintsajajiguen. ¹¹Teequea
noncanteji nocoguitejacoca, irooriji
namecaroquea nococani noshinevae-

taca, aatoguetei ochoocaveta shinetana-
tsinaquea. ¹²Notsamajaquerotarite
quero noncoquempa nantsipetaquempa-
guetei. Arigueteiquea noncoguitejaco-
quempagueti aricaquea aato, iroocaquea
nontaseaqueguetei arigueteiquea onchoo-
caqueguetei oshequiavaetaqueguetei
nosheca, cotanquitsiquea aatoquea
noshimampojanatsi, nococaquea
noshinevaetanaquempaquea. ¹³Nagave-
jaguequeroqueate maasano inintacaa-
quenaca Aapani Irioshi, iriguentitarite
agavejacaquenaqueate Quirishito.
¹⁴Cotanquitsiquea cameetsavaetaque-
quea picavintsajajiaquenaquetei,
pitigarancacaantajiaquenaquea nocogui-
tejacovetacaca.

¹⁵Notsaquequea teequeate pimpeacojiguen-
aquea arejevaecaroquea coramani
notsavanquerogueti Quenquetsatsarensi
Oganejencatatsica Maseroniaqui. Irootapoje-
guetei nosotoanaque noanaqueguetei osamani,
apaniroquea picojiaca aviatimpajia
Piripoquitica picavintsajajiaquenaqueate
pitigarancacaantajiaquenaquea nocoguiteja-
covetacaca. Itsipapae quemisantajiaatsica
teequea irojocajiguenaji. ¹⁶Ariquee
piquejetaqueroquea aisa choocatirajanaguetei
Tesaronicaqui pitigarancacaantajiaquena-
quea nocoguitejacovetacaca, coajicaquea
papijitsijajianaquequea aisa. ¹⁷Noshinevae-
nacaquea namenaqueguetei pojocajiaquena,
cotanquitsiquea arimpaqueate noshinemaja-
tanacaqueate notsaquetarite incavintsajajia-
quempiqueate Aapani Irioshi, yamenaquem-
pitari iriatimpa picavintsajajiaquenaquetei.
¹⁸Yojocapojajanaroquea Epaperorito
maasano pitigarancacaantajiaquenaquea,
choocaquea imaica anaapojajiroquea
nocoguitejacovetacaca, oshequiavaepojiquea.
Namenaquequea mana pojocajiaquena-
queate quejacaquea irioca pojocajiaquena
Aapani Irioshi. Ishineventanacaroquea
iriatimpa, yamenaquerotarite oganejenca-
vaeca, oquejetimotacari casancajencari.

Oquempetacaro aisa imetojajiquenerigueti viratsipae itajaiqueneri. ¹⁹Ariquea Nirioshite irojocamajajiaquempiro maasano coguitejimojiaquempica, oganejencavaetacatari iragavejane aisa yashintavaetacaca yashintaacaarica Quirishito Jesoshi. ²⁰Ancoguitempaniqueate antsarotentajiaquempariquea Aapani Irioshi, aatotari oteroncajatsi intsarotentajitaquemparigueti. Ari oncoquempa.

**Icamantajiaqueriquea iquenquejajiaqueri
maasano**

²¹Pincamantajigueriquea maasano tsarotentamajajigarica Quirishito

Jesoshi nococaniquea noquenquejajiaquempi. Iriraqea napitsarotentarijiate notsipatsipaitacaca inintajiaquequea pinquemacojiaqueri icancaniquea iquenquejajiaquempi. ²²Ariquea iquejejiacaquea maasano quemisantajiatasica choocajiatsica acaniqui, ininquequea pinquemacojiaqueri icancaniquea iquenquejajiaquempi. Iriguentiqueate nintamajajianquitsi pinquemacojiaqueri choocajiatsica itsovironaquitequi Sesa. ²³Noninquequeate incavintsajashirentajiaquempiquea Amajirote Jesoquirishito maasano aviatimpajia pishirequi.